


太常續考

47



太常續考



四庫全書珍本初集

史職

官

部類

太
商務印書館受教育
部中央圖書館籌備
處委託景印故宮博
物院所藏文淵閣本

詳校官編修臣曹振鏞

編修臣程嘉謨覆勘

新中華書局
藏書
景印
故宮
博物院
藏
本

欽定四庫全書

史部十二

太常續考

職官類一官制之屬

提要

臣等謹案太常續考八卷不著撰人名氏考書中所錄蓋明崇禎時太常寺官屬所輯也凡祭祀典禮皆詳悉具載雖不免為案牘簿籍之文而沿革損益之由名物度數之細條分縷晰多明史禮志明會典明集禮及嘉靖

祀典之所未載蓋總括一代之掌故則體貴
簡要專錄一官之職守則義取博賅言各有
當故詳畧迥不同也況集禮作於洪武會典
作於成化嘉靖祀典惟載一時更張之事自
世宗以後百餘年之典制記載闕如此書職
官題名終於崇禎十六年則一代儀章始末
尤為完具固數典者所不可廢矣乾隆四十

四年二月恭校上

總纂官臣紀昀臣陸錫熊臣孫士毅

總校官臣陸費墀

總校官中書臣朱 鈐

校對官中書臣葉 炎

謄錄監生臣高應龍

欽定四庫全書

太常續考卷一

勅諭神樂觀

開基守業必勤政為先趨事赴公非信誠必責傳不云
乎國之大事在祀與戎曩古哲王謹斯二事而上帝皇
祇悅賜天下安和生民康泰朕起寒微而君宇內法古
之道依時以奉上下神祇其於祀神之道若或不潔則
非為生民以祈福而保已命也昔劉康公成肅公會晉

侯伐秦祭於社稷之神然後興師當祭之時畢則有受
胙之禮其受之時必思洋洋乎其在上而穆穆然或左
而或右委心慎敬而受之則祥故敬勝怠者吉怠勝敬
者滅所以成肅公受胙之時起慢神不恭之貌因伐秦
而卒是以知敬者必有動作禮義威儀之則以定命也
於斯祀神之道能者養之以福不能者敗以取禍是故
君子勤禮小人盡力勤禮莫如致敬盡力莫如敦篤敬
在養神篤在守業朕觀古人之敬神也若是其驗禍福

亦若是斯可謂無神而不信乎可謂佞神而祈福乎二者皆不可惟敬之以禮而已朕設神樂觀備樂以享上下神祇所以揆錢糧若干以供樂舞生非倣前代帝王求長生之法而施之然長生之道世有之不過修心清淨脫離幻化速疾去來使無艱阻是其機也於戲昔殷周之父老何存漢唐之耆宿安在果長生之道乎朕設神樂觀以備樂碑之於觀以示後世其觀主不潔樂生不精瞻生不足以此觀之不但君不勤於祀事其朝臣

觀主必也亦然若君勤於祀事朝臣觀主無一體之敬
則國有常憲故茲勒石想宜知悉洪武十二年十二月
日

勅諭神樂觀提點

朕設神樂觀備五音奉上下神祇其勅居觀者皆慕仙
之士其仙之教也或云始廣成子流傳至漢曰道士凡
此者多孤處雲居棲巖屋樹是則宜其修也晨昏息心
以去玄覽宵晝仰觀俯察以滌宿世之冤愆措今生之

善行俄爾有知則倏然忽然躡雲衢而神遊八極往無
不達交無不接如此者安得不與神通故有飛神謁帝
直與人辭者斯可謂修之至也今見修道士某雖未若
此其志已處清虛特命職格神郎五音都提點正一仙
官領神樂觀事爾中書吏部如勅施行諭往欽哉

勅諭神樂觀知觀

朕聞軒轅時崆峒有修者其教獨善其身而已效之者
往往津逮至漢天師張道陵致神倏忽飛符役劍轉斗移

星其幹旋造化人莫知其然今之道士祖而效之雖未
若是人皆清淨斯可職而奉神彼得樂於修煉者也神
樂觀已命正官掌領觀事尚缺分理者部諸樂生以聽
陳舉今見修道士某可授清淨五音知神樂觀事爾中
書吏部如勅施行使往欽哉洪武十二年十二月日

皇帝御製太常寺箴

為國之要事神理民太常典祀式交百神昔予祖考致
嚴祀享厥有純誠敬恭協相朕承丕緒思用允迪爾祇

爾肅以輔以翼儀度必飭粢盛必潔無黷無慢凜乎對
越事神之本惟心之虔豈直臨事平居有嚴神之鑒矣
來歆來止神之歆矣民之福矣無曰冥冥洋洋有臨汝
惟懋哉其慎其欽宣德七年六月日

皇帝勅諭太常寺官

勅藏本寺
香帛庫

朕惟祀神國之大事太常職典三禮協敬同誠以格神
明非庶職之可比爾其念哉夫廟宇壇墀惟修惟潔汎
掃以時惟爾之職犧牲粢盛惟豐惟備時惟馨香惟爾

之職珪幣香祝薦獻之具樂舞之設咸用整飭惟爾之
職爾一念不誠一事不恭一物不備昏為不敬其可不
慎凡典守壇廟及諸執事爾恒戒警之俾約其縱心存
其誠心以時共事進退周旋動合禮節惟爾克正乃克
正人敬以存心廉以守身勤以蒞事躬斯三者人孰不
正凡爾僚屬同心一志庶諧厥任彼或不恭越禮廢事
爾具以聞必斥去之罔俾不良預我裡典爾克齊潔一
心昭事天地鬼神以迓禎祥上佑我國家下福我臣民